

# Usahawan Melayu usah membazir

BH-2/6/2006

**B**UTTERWORTH: Usahawan Bumiputera diingatkan menggunakan pinjaman bank bagi tujuan perniagaan secara berhati-hati dan profesional serta tidak membazir dengan mengadakan kenduri kahwin atau membeli kereta besar.

Peringatan itu diberi Perdana Menteri, Datuk Seri Abdullah Ahmad Badawi, dengan amanat supaya usahawan membuat persediaan dan penilaian rapi sebelum meminjam.

"Mereka harus memastikan wang pinjaman itu diurus dengan cekap dan cermat serta membayar balik pinjaman apabila tiba masanya. Wang pinjaman bank bukannya percuma dan perlu dibayar balik.

"Kereta baru tak payah beli, pakai kereta lama pun tidak apa, yang penting biar perniagaan jadi besar dan kemudian mendapat untung yang lebih besar," katanya berucap merasmikan Ekspo Usahawan Bumiputera Pulau Pinang 2006 di Tapak Ekspo Seberang Jaya di sini, semalam.

Abdullah berkata, peniaga perlu memastikan setiap pinjaman dibayar balik dan ini hanya boleh dilakukan jika perniagaan diuruskan dengan betul.